

## **Dai 15 ai 29 de ma 2008 vëgnel metü fora dessëgns di mituns dles scolines dla Val Badia tl Museum Ladin**

**Dai 15 ai 29 de ma 2008 vëgnel metü fora 300 dessëgns di mituns dles scolines dla Val Badia tl Museum Ladin Ciastel de Tor a San Martin de Tor. La daurida dla mostra vëgn fata dal assessur provincial dla Cultura Ladina Florian Mussner en jöbia ai 15 de ma 2008 dales 14.00.**

Chësta iniziativa, organisada en colauraziun cun l'”Uniun di Maestri ladins” y la direziun dles scolines ladines, se pro da porté i mituns plü dlungia al museum, mo suradöt le museum plü daimpró ai mituns. I dessëgns de chisc pici artisć vëgn aratá operes d'ert che á döt le dërt da gní metüdes fora por le publich y amirades dai visitadus. Te chësta manira é ince i mituns che ciafa interes por l'ert y le museum. Tl vir na bela esperiënza pó i mituns svilupé familiarité y n lian positif cun le museum, che devënta insciö n post de morvëia olache an pó descurí tröpes cosses nöies y interessantes.

La daurida dla mostra vëgn fata dal assessur provincial dla Cultura Ladina Florian Mussner en jöbia ai 15 de ma 2008 dales 14.00. Ala daurida tolará ince pert le presidënt di museums provinziai de Südtirol Bruno Hosp y so vize Heinrich Huber. I dessëgns de chisc jogn artisć gnará portá dant dala diretoria dles scolines ladines Edith Ploner, le presidënt dl'”Uniun di maestri ladins” Iaco Frontull y l'artist Lois Irsara, curadú dla mostra. An podará vijité la mostra dal 29 de ma, dal mertesc ala sabeda dales 10 ales 18 y la domënia dales 14 ales 18.

Tl Museum Ladin restel spo i mituns, sü nenesc y geniturs, tl zënter dl'atenziun ince en gaujun dl De Internacional di Museums, en domënia ai 18 de ma, dediché chësc ann avisa ales generaziuns desvalies che é les protagonistes dl mudamënt sozial. Ater co ma la mostra di mituns é le Museum Ladin che organisëia lapró spo ince jüc tradizionai y ativités desvalies en colauraziun cun l'asoziazion de jüc y tēmp lēde VKE. Te chësta ocasiun sarál spo da aldí le duo Thomas dala Mauta & Alex cun la ciantia “Falten des Lebens” che respidlëia de plëgn les tematiches dl de organisé dal Museum Ladin.